

侍者極善目錄

門人運病歸尋

後南弟子劉起相重校

慈山老人夢遊集

新文豐出版公司

印行

卍

侍者福善日錄  
門人通炯編輯

憨山老人夢遊集  
(三)

新文豐出版公司印行

憨山老人夢遊集卷之二十九

侍者福善目錄

門人通炯編輯

嶺南弟子劉起相重較

塔銘

徑山化城寺澹居鎧公塔銘

歷觀古今豪傑之士。有戡亂之才。而不能降心。有拔  
山之力。而不能割愛。是知能透情關。掉臂生死者。非  
宿種深根。雖丈夫亦未易爲力也。予於鎧公有異焉。  
公諱法鎧。字忍之。別號澹居。江陰人。姓趙氏。世稱巨  
族。母夢僧趺坐於堂上。遂生公。公生而穎慧。爲兒嬉  
喜佛事。侗儻逸羣。長習舉子業。才名奕奕。乃塵視世

榮志性命之學。父母爲聘。竟不願。父卒。乃杖策孤遊。登太和山。遇羽士授長生之術。過武昌。遇講良知學者。皆掉頭棄去。一日入僧舍。見金剛經。讀至如來說諸心皆爲非心。忽有省。乃曰。是吾所歸也。還過浮山。坐三曲洞。瀝血寫孝經。癸巳。遊皖城。達觀禪師過江上。公往參。未面。門外作禮。再謁。乃見。求度。未許。師登馬祖菴。公偕阮公自華至。是夜師夢披白鎧。人侍其側。及公至。着白衣。懇求剃度。師許之。因命今名。薙髮授具戒。時年三十有三。師命叅己躬下事。公卽辭入天目。誅茅於分經臺。弔影藏修。單提向上。極力叅究。

蔬食不糝。單衣露肘。每降妄心。燃香熬臂。如是者三年。大有開發。石帆岳公入山。見公弊衣蓬頭。垢面跣足。腰鎌採薪。因問你是澹和尚甚麼人。應曰。我是他使的。岳公大笑曰。真道人也。久之。下天目。復過宣城。掩關於西樂。乃習荷重負。肩試四十斤。經行以苦筋骨。調昏睡。其道益進。後出關行脚。至匡廬。每過叢林坐廊下。忽焉達旦。寤寐一如也。辛丑。至都門。省本師於慈壽。初入室。便問某甲爲生死大事。願師指示。師卽痛棒。如是者再。一日又問曰。永嘉云。了卽業障本來空。只如師子尊者。二祖肇公等。是了得也未。聲未

絕師連棒曰。會麼會麼。公曰。不會。師曰。本來空是甚  
麼。乾屎橛。公猛省。但點首而已。自是見地卽穩密。壬  
寅秋。南還。入浮山。會聖巖。乃宋遠錄公。與歐陽六一。  
因碁說法處。久爲俗業。皖城澹宇阮公。聚族復之。請  
公以居。重新遠公塔。瀝血書梵網經。日課金剛般若。  
爲母壽。戊申。應太史觀我吳公。請住持浮山大華嚴  
寺。居常以本分爲佛事。四方衲子至者。唯示直捷處。  
乃集諸祖入道因緣。梓之初達。師刻大藏。以雙徑寂  
照爲刻場。師靈龕亦歸之。公欲滿本師願。遂往。庚戌。  
公至山。見多霧濕。下有化城故址。乃宋佛日宣禪師

道場。太史具區馮公議修復爲藏板處。公簡得其手  
扎。示左方伯本如吳公。吳公按址畫界。奪諸豪右之  
手。仍爲佛地。又贖臨安太平寺田百畝。供贍常住。於  
是藏事有歸焉。甲寅。吳公開府於蜀。公以刻藏因緣  
往議。遂登峨嵋禮普賢。乙卯春。同直指若谷徐公出  
蜀。是年秋還徑山。大師靈龕已入土。司成文寧朱公  
禮師塔。按形家言。知地有水。議改葬。公與師護法弟  
子仲瀆繆公。行求善地。改卜於鵬搏峰之陽。丙辰冬。  
予自南嶽來赴弔。盡法門死生之義。至金沙爲文以  
祭。預定於長至月十九日。及至會。是日茶毘。予因舉



火請靈骨入塔。以酬生平知己。達師末後一段光明。公之力也。諺曰。棒頭出孝子。公實以之。予歸匡山。公疲於津梁。以寂照付杲公。以化城爲十方接待常住。囑諸弟子曰。汝等袈裟下。各有一坐具地。何戀戀於此耶。辛酉秋七月。遍辭諸檀越。過白門。以藏事托本如吳公。冬十月。歸雙徑。一日倚杖立堂下。顧謂衆曰。羚羊挂角。不出十二。衆罔測。至晚爇香禮佛。沐浴更衣。趺坐默然。至旦忽脫去。天啟辛酉十二月十三日也。弟子某某等。茶毘葬於某某處。公生於嘉靖辛酉三月二十一日。世壽六十有一。僧臘二十有八。予每



見達師門庭峻絕。恒思後難其人。及至雙徑。見公貌粹骨剛。稜稜英氣。四方會葬者。屬至。百凡蝟集。公擘畫遊刃。指揮如意。意氣閒閒。不動聲色。其於以送死復生。盡形畢命。繼志述事。光前絕後。斯爲達師。末後弟子。無忝的骨者也。私謂公之才。足以應世。力足以荷擔。其爲道也。艱難辛苦。靡不備歷。其於事也。見義勇爲。不避刀鋸。其視利養。如空花水月。死生之際。超然如脫弊屣。噫。非大丈夫夙根披露。心契無生。寢處於有形之外者。曷能如此哉。公弟子元亮具狀。走匡山乞予爲銘。予念法門之誼。乃爲銘曰。

叢林秋晚。大法頽綱。歲寒霜雪。紫栢用光。其道旣光。門庭益峻。壁立懸崖。大有徑庭。望之者慄。親之者退。棘棒一條。全無忌諱。窟中獅子。爪牙纔露。是獅子兒。略無回互。一棒之下。翻身踔跳。大步遊行。迴途復妙。渾身荷擔。不遺餘力。恒沙法藏。信手揮斥。法輪無窮。轉之未盡。津梁旣疲。隨緣究竟。旅泊安居。乾城行處。一切盡爲。十方常住。生前不有。末後亦無。一塵不立。本自如如。羚羊挂角。分明指示。撩起便行。撒手歸去。一搭孤標。空中建立。法身彌露。風聲月色。

南岳山主瑞光祥公銘

盡法界量。無一物而非法身。諸塵勞門。無一行而非佛事。况乎調練三業。精專一心。遠離世間。而勤淨土之行者乎。故吾佛白毫光。照東方萬八千界。光中菩薩種種因緣。而求佛道。若南岳祥公者。豈非光中現。攝念山林。一心勤求佛道者乎。按狀公諱法祥。字瑞光。別號隱南。越嵎縣周氏子。生而超曠。業儒不第。慨然有出世志。從其叔遊京師。往叅嘯巖老人。巖示以向上。公曰。弟子塵勞中人。未敢承當。巖曰。卽念佛法門。最爲捷要。公領之。居頃南還。決志出家。禮本邑喜菴愷公。薙髮。時年三十有二矣。謁棲霞素菴法師。

受具。依棲講肆。三年遂棄去。北遊大都。叅遍融和尚。一見問曰。汝作麼生。公曰。某甲爲生死出家。一向修念佛法門。不審是第一義諦否。融曰。更不容念佛外。別求第一義諦。公領旨作禮。慈聖皇太后大作佛事。建淨業期。請居首座。三年期罷。遊五臺之伏牛。遍叅諸老宿。時栢松和尚。牛山耆舊也。公見與語心契。畱住石室。弔影絕跡。木食三年。一日趺坐。雪積滿床。火絕衣濕。侍者往見。驚走報松。松往視。見公定。乃擊磬警覺。問曰。煙寒灰冷。作麼境會。公曰。山原是石。冰原是水。雪飛滿崖。不知所以。松曰。此是暫息塵勞。得輕

安耳。若耽着此境，卽墮偏空。勿滯於此，宜行脚去。逢南卽止。授以鉢袋，囑曰：禪和往南走，報道七十九。我也不多時。大家相廝守。公遂瓢笠徑造峨眉禮普賢。注大峨眉。八越月。苦切參究。心地未安。因憶松栢逢南之記。遂之南嶽。登祝融峰頂。望古大明。山林崇茂。卽往卜居。未幾。赤帝峰僧楚然。請主閱藏。公至一宿。夜半恍惚。夢中告曰：此非師所居。速去。詰朝將他往。適僧大寬畱住側刀峰。公應諾。行三日。藏經殿燬。公以嘯巖開示念佛法門。志終身從事。欲以豆爲數。寬願充化主。募豆四十八石。公從此放下身心。影不出。

山日夜精勤。以豆爲珠。淨念相繼。至終身焉。由是稱爲豆兒佛云。公住山絕無外緣。聲光日露。十方衲子。違歸之。四事不思而至。叢林不作而成。南嶽寂寞多年。得公一振。起居常誠。諸弟子。汝剃除鬚髮。不知有生死大事。但倚牆靠壁。業識茫茫。喚作甚麼。豈非吾佛所呵。衲衣在空閒。假名阿練若。苟不專心淨業。大限到來。將何抵對。閻老子乎。聞者感泣。公雖絕意人世。當世君子。聞風景仰。廣西方伯。劉公謁廟。遣書請一見。力謝不往。衡州郡丞盧公祀廟。點失期者。罰約三十餘石送公。公曰。老僧豈以一鉢飯。歛衆怨乎。竟



不納。長沙吉王嚮公。差內使往請。公曰。山僧行脚倦。遊息肩於此。誓死效遠公。跡不入俗。不敢奉命。王遣前使。賫送華嚴經二部。大疏鈔一部。齋資百兩。公領令旨。以齋資散合山。以廣王惠。餘畱鎮山門。王益加重焉。公接納往來。不擇臧否。一味平等慈悲。荆襄大盜。賈二唐九等七人。被捕急來歸。發露懺悔。哀乞活命。公憐其誠納之。冠以道巾。令隨衆作務。捕官至。見公慈心藹然。又聞念佛音聲有感。乃解腰纏三金。辦齋而去。其盜亦化爲苦行僧。辛丑歲饑。大衆絕糧。三日采蕨而食。公日夜禱于護法神。有少年僧於山下。



檀越家。化米豆百數十石送至。詢問前僧無有也。公自居側刀峰。精修淨業。三十餘年。未常暫輟。居常脇不至蓆。不設方丈。唯坐一龕於佛殿。不安庫房。筭無長物。滅之日。唯胡椒一瓶。舊布數片而已。無勞侍者。不發化主。不結外援。不交權貴。所食麤糲。常以糠麩爲餅充飧。僧有投之地者。公拾取煨而啖之。每經行念佛。必荷鋤出遊。凡見遺穢。必以土掩之。或曰。師何過勞如此。公曰。一片清淨地。恐山神見穢矣。公生平隨衆。年七十餘。尙無法嗣。臨江居士傅某。向賈於江湖。一旦棄妻子。出家峨嵋。名同融。萬曆壬寅冬來叅。

心相印契。卽付衣鉢。偈曰。西來大意問如何。直至於  
今見也麼。心上不生何有見。嚙嚙唵娑婆訶。融卽  
依棲以終焉。公向與衆周旋無倦。一日索浴。禮佛告  
衆曰。瓜子熟也。正落蒂時。堂中無知之者。時融居毘  
佛洞。乃遣人往喚。融至峰前。聞音樂聲。入室寂然。公  
趺坐。融作禮。公曰。我行矣。先以鉢袋累汝。今以念珠  
拄杖畱別。善自護持。良久令首座領衆念佛。公趺坐  
誠衆曰。毋得虛張捏怪。誑惑世人。獨一味老實念佛。  
言訖。合掌端坐而逝。萬曆庚戌二月初六日寅時也。  
公生於嘉靖壬辰九月望日。世壽七十有九。法臘四